



Funded by
the European Union



«Համընդհանուր ներառում. Պետական ներդրումների արդյունավետություն և
հաշվետվողականություն»

ծրագիր

ՆԵՐԱՌԱԿԱՆ ԿՐԹՈՒԹՅԱՆ ԻՐԱԿԱՆԱՅՄԱՆ ԳՈՐԾՆԹԱՅԻ ՎԵՐԱԲԵՐՅԱԼ

ՈՐԱԿԱԿԱՆ ՀԵՏԱԶՈՏՈՒԹՅԱՆ

ԶԵԿՈՒՅՑ



2025թ.

Ակնարկ հետազոտության մասին

Սույն զեկույցը պատրաստվել է «Լուսաստղ» հասարակական կազմակերպության կողմից «Բյուջեներ քաղաքացիների համար» ծրագրի «Համընդհանուր ներառում. Պետական ներդրումների արդյունավետություն և հաշվետվողականություն» ենթադրամաշնորհի շրջանակներում:

Ծրագիրն իրականացվում է Եվրոպական Միության ֆինանսավորմամբ «Իրավաբանների Հայկական Ասոցիացիա» ՀԿ-ի, «Տնտեսական Զարգացման և Հետազոտությունների» կենտրոնի և «Ագորա Սենթրլ Յուրոփ» ՀԿ-ի համագործակցությամբ:

Զեկույցը նպատակ ունի ՀՀ պետական բյուջեից ներառական կրթությանը տրամադրվող հատկացումների արդյունավետության և կատարողականի գնահատման միջոցով բացահայտել համընդհանուր ներառական կրթության գործընթացի խնդիրները:

«Լուսաստղ» ԲՀԿ

Հասցե՝ ՀՀ, Լոռու մարզ, ք. Վանաձոր, Տիգրան Մեծ 16

Հեռախոս՝ +37455707191

Էլ. Փոստ՝ lusastghhk@gmail.com

Սույն զեկույցը մշակվել է Եվրոպական միության ֆինանսական աջակցությամբ, «Իրավաբանների հայկական ասոցիացիա» հասարակական կազմակերպության ղեկավարությամբ կոնսորցիումով գործարկվող «Բյուջեներ քաղաքացիների համար» ծրագրով տրամադրված ենթադրամաշնորհի շրջանակներում «Լուսաստղ» հասարակական կազմակերպության կողմից իրականացվող «Համընդհանուր ներառում. Պետական ներդրումների արդյունավետություն և հաշվետվողականություն» ծրագրի շրջանակներում: Բովանդակության համար պատասխանատվություն է կրում «Լուսաստղ» հասարակական կազմակերպությունը, և պարտադիր չէ, որ այն արտահայտի Եվրոպական միության տեսակետները:

ԲՈՎԱՆԴԱԿՈՒԹՅՈՒՆ

1. Հապավումներ	4
2. Նախաբան	5
3. Մեթոդաբանություն	6
4. Հայաստանի Հանրապետությունում համընդհանուր ներառական կրթության ֆինանսական կառավարման քաղաքականություն	6
5. Երեխայի ներառական կրթությանն աջակցելու եռաստիճան համակարգի քաղաքականություն--	6
6. ՏՄԱԿ և ՀՄԿ համակարգի դերակատարությունը ներառական կրթության շրջանակում --	11
7. Եզրակացություն	14
8. Առաջարկություններ	15
9. Մոնիտորինգի գործիքներ	16

ՀԱՊԱՎՈՒՄՆԵՐ

ՀՀ_ Հայաստանի Հանրապետություն

ԿԳՄՍ_ Կրթության, Գիտության, Մշակույթի և Սպորտի նախարարություն

ՀՈՒԱ_ Հաշմանդամություն ունեցող անձ

ԿԶԱՊԿ_ Կրթության և զարգացման առանձնահատուկ պայմանների կարիք ունեցող

ԿԱՊԿՈՒ_ Կրթության առանձնահատուկ պայմանների կարիք ունեցող

ՀՄԿ_ Հանրապետական մանկավարժահոգեբանական աջակցության կենտրոն

ՏՄԱԿ_ Տարածքային մանկավարժահոգեբանական աջակցության կենտրոն

ԱՈՒՊ_ Անհատական ուսուցման պլան

ԱՈՒԶՊ-Անհատական ուսուցման և զարգացման պլան

Հայաստանի Հանրապետությունում համընդհանուր ներառական կրթության ոլորտում պետական քաղաքականությունն ուղղված է երեխաներին կրթության մատչելիության ապահովմանը՝ հաշվի առնելով նրանց տարբեր հնարավորությունները և կարիքները: Կրթության, գիտության, մշակույթի և սպորտի նախարարությունը (ԿԳՄՍ) համակարգում է այդ ծախսերը, ինչը թույլ է տալիս արդյունավետ կազմակերպել ներառական կրթության գործընթացը:

2000-ական թվականներին, երբ Հայաստանը մասը կազմեց համաշխարհային կրթական գործընթացի, կրթության ոլորտում սկսվեցին ֆունդամենտալ փոփոխություններ իրականացվել: Մասնավորապես, 2004-ին ընդունվեց «Կրթության մասին» օրենքը, որում դրվեցին ներառական կրթության սկզբունքները: Այդ ժամանակվանից սկսվեցին փորձեր և նախաձեռնություններ՝ նպաստելու հաշմանդամություն ունեցող երեխաների ընդգրկմանը հանրակրթական դպրոցներում: Պետությունը մշտապես փորձում է բարելավել ներառական կրթության որակը, ապահովել համապատասխան նյութական ու տեխնիկական ռեսուրսներ, ինչպես նաև ուսուցիչների պատրաստվածությունը՝ նրանց կրթել, թե ինչպես աշխատել տարբեր կարիքներ ունեցող աշակերտների հետ: Այս կերպ Հայաստանի պետական քաղաքականությունն ուղղված է ոչ միայն համընդհանուր կրթական հնարավորությունների ընդլայնմանը, այլ նաև հասարակության լիարժեք ներառմանը՝ հաշվի առնելով կրթական և սոցիալական խոչընդոտների վերացման կարևորությունը:

2014-2020 թվականներին տեղի ունեցան մի շարք փոխակերպումներ: Այս շրջանում արդեն ձևավորվել էր ներառական կրթության համակարգը: Մասնավորապես, 2014 թ. ՀՀ Ազգային Ժողովն ընդունել է «Հանրակրթության մասին» ՀՀ օրենքում լրացումներ և փոփոխություններ կատարելու մասին» ՀՀ օրենքը (ՀՕ-200-Ն), համաձայն որի հանրակրթության համակարգում անցում է կատարվել համընդհանուր ներառական կրթության:

Կրթական հաստատություններում ստեղծվեցին համապատասխան պայմաններ՝ երեխայի կարիքներին համահունչ կրթության կազմակերպման համար, ու սկսվեցին ներդրվել հատուկ կրթական մեթոդներ: Գործնականում ավելի շատ դպրոցներ սկսեցին ընդունել երեխաների, ովքեր նախկինում ուսումը ստանում էին միայն հատուկ կրթական հաստատություններում: Սկսած 2020թ-ից մինչև այժմ պետության կողմից իրականացվող ներառական կրթության բարեփոխման քաղաքականության հիմքում տեղեկատվական և ռեսուրսային աջակցությունն է: Այժմ ԿԳՄՍ նախարարությունը շարունակում է զարգացնել ներառական կրթությունը, որի շրջանակներում տեղակայվում են ռեսուրսային դասարաններ, ապահովվում են ուսուցիչների մշտական վերապատրաստում և ստեղծվում են համապատասխան ենթակառուցվածքներ: Ամբողջ երկրում ակտիվորեն իրականացվում են ծրագրեր, որոնք խթանում են ներառական կրթությունը, և այդ ընթացքում մեծ ուշադրություն է դարձվում կրթական գործընթացի որակի բարձրացմանը: Այս գործընթացի շրջանակներում շատ կարևորվում է նաև կրթության անհատականացված մոտեցումը, որտեղ յուրաքանչյուր երեխա կարող է զարգանալ իր պոտենցիալին համապատասխան՝ առանց խտրականության:

25 և ավելի տարիների ընթացքում ներառական կրթության համակարգը ապրելով զարգացման մի քանի փուլեր առհասարակ չի դիտարկվել զգայուն և ներառական ֆինանսավորման տեսանկյունից, որևէ անգամ չի պարզեցվել ներառական կրթության կայացմանը տրամադրվող պետական բյուջեն: Իրականում, ներառական կրթության ոլորտը շատ կարևորվում է ինչպես սոցիալական, այնպես էլ տնտեսական տեսանկյունից: Երբ մենք խոսում ենք ներառական կրթության ֆինանսավորման մասին, ապա պետք է ընդգծել, որ դրա կայացումը և

արդյունավետ զարգացումը հնարավոր են միայն այն ժամանակ, երբ ֆինանսական ռեսուրսները լինեն բավարար և ճիշտ բաշխված:

ՄԵԹՈԴԱԲԱՆՈՒԹՅՈՒՆ

Սույն զեկույցը հիմնված է որակական մեթոդաբանության գործիքակազմի վրա: Կատարվել է աղբյուրների առաջնային և երկրորդային ուսումնասիրություն: Ի լրումն, տվյալներ են ներառվել պատկան մարմիններին կատարված պաշտոնական հարցումներին ի պատասխան ստացված նամակներից:

Երկրորդային հետազոտության են ենթարկվել 2024թ.-ի ՀՀ Պետական բյուջեի Հանրակրթության հատվածի Համընդհանուր ներառական կրթությանն ուղղված միջոցները: Ուսումնասիրվել են պետբյուջեի հավելվածները՝ Գործառնական, Տնտեսագիտական և Ծրագրային դասակարգմամբ, ինչպես նաև՝ պետական միջոցներից ՊՈԱԿ-ներին և այլ՝ մրցութային կարգով ընտրված կազմակերպություններին տրամադրված դրամաշնորհները, պետական բյուջեի ծրագրերի և միջոցառումների գծով արդյունքային (կատարողական) ցուցանիշների կատարման վերաբերյալ տարեկան /12 ամսվա/ կտրվածքով:


Որպես առաջնային հետազոտության գործիք կիրառել ենք ֆոկլուս խմբային քննարկումները ԿԱՊԿՈՒ երեխաների ծնողների շրջանում և խորացված հարցազրույցները ընտրված դպրոցների տնօրենների հետ: Իրականացվել է 3 ֆոկլուս խմբային քննարկում ԿԱՊԿՈՒ երեխաների ծնողական համայնքի շրջանում և 7 խորացված հարցազրույց ընտրված դպրոցների տնօրենների հետ: Դպրոցներն ընտրվել են Լոռու և Շիրակի մարզերից՝ հիմք ընդունելով ԿԱՊԿՈՒ երեխաների քանակը տվյալ դպրոցում:

Հայաստանի Հանրապետությունում համընդհանուր ներառական կրթության ֆինանսական կառավարման քաղաքականություն

2024 թ-ի՝ ՀՀ Կառավարության կողմից հաստատված բյուջեն կազմում է 3023,2 մլրդ ՀՀ դրամ, որից կրթության ոլորտին տրամադրվել է 317, 2 մլրդ դրամ կամ պետական ծախսերի շուրջ 10 %-ը, որից էլ համընդհանուր ներառական կրթության ապահովման համար հատկացվել է մոտ 3, 8 մլրդ դրամ կամ կրթության ոլորտին տրամադրված գումարի 1.2 %-ը: Կրթության ոլորտում պետական քաղաքականությունը 2024թ. իրականացվել է 14 բյուջետային ծրագրերի միջոցով: Ինչպես ներկայացված է 2024թ.-ի պետական բյուջեի Ծրագրերի և միջոցառումների դասակարգման հավելվածում՝ Համընդհանուր ներառական կրթության ներդրման համակարգի նպատակն է. յուրաքանչյուր երեխայի համար կրթության մատչելիության, հավասար մասնակցության հնարավորության և որակի ապահովում՝ զարգացման առանձնահատկություններին համապատասխան և անհրաժեշտ պայմանների ստեղծման միջոցով: Իսկ վերջնական արդյունքը կլինի հանրակրթական հաստատություններում խոցելի խմբերի երեխաների ընդգրկվածության ապահովումը:

Համընդհանուր ներառական կրթության ներդրմանն ուղղված բյուջեի առյուծի բաժինը՝ մոտ 3, 7 մլրդ ՀՀ դրամ կամ գումարի 97,8%-ը, հատկացված է մանկավարժաժողովրդական աջակցության ծառայությունների տրամադրմանը և կրթության առանձնահատուկ պայմանների կարիք ունեցող երեխաների (ԿԱՊԿՈՒ) կրթության կազմակերպմանն օժանդակող միջոցառումների իրականացմանը, իսկ 82 մլն. ՀՀ դրամ՝ տրամադրված գումարի

2,2%-ը, հատկացված է աուտիզմ և զարգացման խանգարումներ ունեցող երեխաներին մանկավարժահոգեբանական աջակցության տրամադրմանը:



Աղբյուրը՝ ՀՀ ֆինանսների նախարարություն

**ԵՐԵՒԱՅԻ ՆԵՐԱՌԱԿԱՆ ԿՐԹՈՒԹՅԱՆՆ ԱԶԱԿՑԵԼՈՒ ԵՌԱՍՏԻՃԱՆ
ՀԱՄԱԿԱՐԳԻ ՔԱՂԱՔԱԿԱՆՈՒԹՅՈՒՆ**

1. Հիմնական մակարդակ – Հանրակրթական դպրոց

Նախ և առաջ աջակցությունը կազմակերպվում է անմիջապես հանրակրթական դպրոցում, որտեղ սովորում է երեխան: Դպրոցում գործում են ներառական կրթության կազմակերպման ներքին մեխանիզմներ, որոնց նպատակն է աջակցել սովորողի կրթությանը՝ առանց դպրոցական միջավայրից դուրս գալու անհրաժեշտության: Այս մակարդակում՝

Ներգրավվում են ուսուցիչները, ուսուցչի օգնականը, հատուկ մանկավարժը (եթե կա), հոգեբանը:

Կազմվում է Անհատական Ուսուցման Պլան (ԱՈՒՊ)՝ երեխայի կարիքներին համապատասխան:

Իրականացվում են խելամիտ հարմարեցումներ՝ ուսումնական միջավայրում:

Աջակցությունը հիմնականում ունի կանխարգելիչ և անմիջական բնույթ:

Այս փուլը կարևոր է, քանի որ նպատակ ունի հնարավորինս ինքնուրույն կերպով կարգավորել երեխայի ուսումնառության ընթացքը՝ դպրոցի ներքին ռեսուրսներով:

2. Երկրորդ մակարդակ – ՏՄԱԿ (Տարածքային մանկավարժահոգեբանական աջակցման կենտրոն)

Երբ դպրոցը չունի բավարար ռեսուրսներ կամ կարողություններ երեխայի կարիքներին պատշաճ արձագանքելու համար, աջակցության գործընթացը տեղափոխվում է ՏՄԱԿ՝ տարածաշրջանային մակարդակ: ՏՄԱԿ-ները գործում են որպես միջանկյալ օղակ՝ դպրոցների և հանրապետական կենտրոնի միջև:

Այստեղ աշխատում են ոլորտային մասնագետներ՝ հատուկ մանկավարժներ, լոգոպեդներ,

հոգեբաններ, սոցիալական աշխատողներ:

Իրականացվում է երեխայի կարիքների բազմակողմանի գնահատում:

Աշխատանք է տարվում երեխայի, ծնողների և դպրոցի աշխատակիցների հետ՝ կրթական և հոգեբանական աջակցության ծրագրեր մշակելու և իրականացնելու համար:

Ընդգծվում է միջմասնագիտական համագործակցության կարևորությունը:

ՏՄԱԿ-ը հաճախ կազմակերպում է նաև վերապատրաստումներ դպրոցների անձնակազմի համար՝ ներառական կրթության որակը բարելավելու նպատակով:

3. Երրորդ մակարդակ – ՀՄԿ (Հանրապետական մանկավարժահոգեբանական կենտրոն)

Եռաստիճան համակարգի վերին մակարդակը հանդիսանում է ՀՄԿ-ը, որն ունի հանրապետական նշանակություն և համակարգում է ողջ գործընթացը:

ՀՄԿ-ը մշակում է քաղաքականություն, մեթոդական ուղեցույցներ և չափորոշիչներ:

Իրականացնում է ՏՄԱԿ-ների մասնագիտական վերահսկում և աջակցություն:

Ուղղորդում է բարդ դեպքերը, որոնք պահանջում են խորացված միջամտություն կամ եզակի մոտեցումներ:

Կատարում է իրավիճակային վերլուծություններ և մասնակցում է ներառական կրթության քաղաքականության բարեփոխմանը:

Այս մակարդակը նաև հանդիսանում է կապող օղակ ԿԳՄՍ նախարարության, առողջապահական համակարգի և այլ գործընկեր կառույցների միջև՝ ապահովելով համակարգային մոտեցում:

Հանրակրթական դպրոցներ.

ՀՀ «Հանրակրթության մասին» օրենքի 2-րդ հոդվածի 1-ին կետը պնդում է, որ համընդհանուր ներառական կրթությունը ապահովում է յուրաքանչյուր երեխայի կրթության իրավունքը: Այս օրենքի 35-րդ հոդվածի 3.1 կետը նախատեսում է պետական ֆինանսավորում, որը ապահովում է խելամիտ հարմարեցումներ՝ հաշմանդամություն ունեցող երեխաների կրթության կազմակերպման համար:

ԿԳՄՍ նախարարի 2022 թվականի դեկտեմբերի 7-ի N79-Ն հրամանը նախատեսում է ֆինանսավորում հաշմանդամություն ունեցող երեխաների համար ֆիզիկական միջավայրի հարմարեցումների և կրթության առանձնահատուկ պայմանների ստեղծման համար: Արդյունքում, հաշմանդամություն ունեցող երեխաների կրթության համար ֆիզիկական միջավայրի հարմարեցումների ծախսերը հաշվարկվում են երեք տարվա կտրվածքով՝ 3300 հազար ՀՀ դրամ (սկսած 2024 թվականից):

ԿԳՄՍ նախարարի մյուս՝ 2017 թվականի ապրիլի 13-ի N370-Ն հրամանը սահմանում է, որ կրթության առանձնահատուկ պայմաններ ունեցող երեխաների ուսուցման համար անհատական տեխնիկական միջոցներ, գույք և սարքավորումներ պետք է տրամադրվեն՝ ըստ Սովորողի Անահատական Ուսուցման Պլանի (ԱՈԻՊ): Հիմք ընդունելով այս հրամանը

հանրապետության հանրակրթական դպրոցներում սովորող կրթության առանձնահատուկ պայմանների կարիք ունեցող երեխաներին տարեկան տրամադրվում է 27 հազար ՀՀ դրամ՝ յուրաքանչյուր ԿԱՊԿՈւ երեխայի համար:

Բացի վերը նշված միջոցառումները, հանրակրթական դպրոցներում ներառված են 2968.5 ուսուցիչների օգնականների հաստիքային միավորներ, որոնց վարձատրման համար 2024թ. Հատկացվել է մոտ 4.153 միլիոն ՀՀ դրամ:

Հաշմանդամություն ունեցող երեխաների կրթության կազմակերպման գործընթացում խելամիտ հարմարեցումներ ապահովելու նպատակով 2024թ. ֆինանսավորումը կատարվել է 10901 սանի համար:

Պետական բյուջեից տրամադրվող միջոցները համարում են ոչ բավարար, քանի որ այնքան չի հատկացվում, որ դպրոցում ունեցել ենք զուգարանի խնդիր, չի լուծվել տնօրենի առաջարկով երեխային հանել-տարել ենք մեկ այլ դպրոց, որտեղ կա նման զուգարան: Ինձ թվում է, դա հենց ֆինանսի բացակայության պատճառով է:

«Ֆոկուս խմբային քննարկման մասնակից ծնող»

Ֆոկուս խմբային քննարկումների արդյունքներով կարող ենք ներկայացնել այն հիմնական մարտահրավերները, որոնց բախվում են ծնողները՝ ներառական կրթության համակարգում: Ծնողների արձագանքները հստակ վկայում են ինչպես համակարգային թերությունների, այնպես էլ բարելավման ուղղությամբ ակնկալիքների մասին: Նրանք, անդրադառնալով ֆիզիկական միջավայրի խնդիրներին, նշում են թեքահարթակների, սանհանգույցների բացակայության փաստը, ինչը խոչընդոտում է երեխաների տեղաշարժը: Ծնողներից շատերը նշում են, որ դպրոցները պարզապես չեն ցանկանում հաշմանդամություն ունեցող երեխաների ընդգրկել դպրոցներում : Նշում են, որ շատ հաճախ նրանք ուղղորդում են այլ դպրոց, պատճառաբանելով որ այդ դպրոցներում ենթակառուցվածքները հարմարեցված են: Այս պատկերը վկայում է, որ դպրոցներում ներառական կրթությունը չի ապահովվում համապատասխան ենթակառուցվածքներով: Միջավայրը, որը պետք է լինի աջակցող և խթանող, դառնում է խոչընդոտող: Բացի այդ, վերոնշյալ վերաբերմունքը կարող է նպաստել ծնողների թերահավատությանը և երեխաների մեկուսացման ռիսկին:

Եթե ունի հենաշարժողական խնդիր, բռնվելով է քայլում, դպրոցը պետք է բռնակներ սարքի մինչև ճաշարան, մինչև զուգարան, բայց մեզինց սայլակ են ուզել և առաջարկել են պամպերս հագցնել, իսկ ես պայքարում եմ, որ սայլակ չնստի, պամպերս չօգտագործի, զուգարանակոնք չկա, գոնե մի հատ հարմարեցված լիներ:

«Ֆոկուս խմբային քննարկման մասնակից ծնող»

Ինչ վերաբերում է կրթական գործընթացի կազմակերպման որակին՝ ծնողների արձագանքները խիստ բևեռված են: Որոշ դպրոցներ փորձում են իսկապես կազմակերպել ներառականություն, իսկ մյուսները ձևականորեն են վերաբերվում: Այս ամենն ազդում է ոչ միայն կրթության որակի, այլև երեխայի ներգրավվածության և զարգացման վրա: Խոսելով ուսուցիչների և դպրոցների վերաբերմունքի մասին պետք է նշենք, որ ըստ վերլուծության,

վերաբերմունքը համակարգային է: Այն ընդգրկում է ոչ միայն ուսուցիչներին, այլև կրթական կառույցը, ինչպես նաև համայնքային՝ ծնողական մակարդակը: Մա ներառականության մշակույթի բացակայության արդյունք է: Վերաբերմունքի փոփոխությունը պետք է լինի կրթության բարեփոխման առանցքային բաղադրիչ: Ծնողները ցանկանում են, որ երեխաների հետ աշխատեն նպատակային մասնագետներ՝ լոգոպեդ, հոգեբան, հատուկ մանկավարժ: Նրանք ակնկալում են հստակ ժամանակացույց, երբ երեխան պիտի գնա դպրոց ու վերադառնա որոշակի ժամերի: Նրանցից շատերը ընդգծում են, որ իրենք ստիպված են դպրոցի բակում սպասել, քանի որ դասապրոցեսի կազմակերպման խնդիր կա: Նրանք ներառական կրթության նկատմամբ ունեն վստահության պակաս: Ըստ նրանց, երբ համակարգը չի կարողանում ճիշտ գնահատել ռիսկերը և կատարել չնախատեսված իրավիճակների կանխատեսումներ, ինչպես նաև տրամադրել մասնագիտացված աջակցություն, ծնողն ինքն է սկսում լրացնել այդ բացը՝ դառնալով ուսուցման վերահսկող կամ օժանդակող գործոն: Այս խնդիրը բերում է նաև ծնողի ծանրաբեռնվածության ավելացման և երեխայի ինքնուրույնության սահմանափակման:

Ինչ վերաբերվում է ծնողների ներգրավվածությանը դպրոցի բյուջեի, կրթական գործընթացների և անհատական ուսուցման պլանների (ԱՌԻՊ) կազմման գործընթացում, ծնողների մեծ մասը նշում է, որ իրենք անտեղյակ են այդ գործընթացներից: Այս հանգամանքը կարող է պայմանավորված լինել կամ հաղորդակցության բացակայությամբ, կամ ծնողների կողմից ժամանակի կամ հետաքրքրության պակասով: Անհատական ուսուցման պլանները, որոնք հատուկ կարիքներով երեխաների համար կարևոր գործիք են, հաճախ կազմվում են առանց ծնողների մասնակցության, ինչը նվազեցնում է դրանց արդյունավետությունը, ընդգծում են ծնողները: Նրանք մատնանշում են, որ կարող են չգիտակցել իրենց դերը կամ իրավունքները դպրոցական գործընթացներում, ներառյալ ԱՌԻՊ-ի մշակման մեջ: Ծնողները հաճախ մեծ ակնկալիքներ ունեն դպրոցներից՝ վստահ լինելով, որ երեխաների կրթության և զարգացման մեջ ուսուցիչներն առանցքային դեր ունեն: Սակայն իրականությունն այն է, որ շատ դեպքերում երեխաներն ակտիվ մասնակցում են միայն մայրենիի և մաթեմատիկայի դասերին, մինչդեռ մնացած առարկաների ժամանակ հաճախ զանգում են ծնողներին՝ խնդրելով վերցնել երեխաներին, քանի որ նրանք, իբր, խանգարում են դասապրոցեսին: Ֆիզկուլտուրայի ուսուցիչները երբեմն թերահավատությամբ են մոտենում ներառական կրթությանը՝ մտավախություն ունենալով, որ հաշմանդամություն ունեցող երեխան կարող է վնասվել կամ վնասել մյուսներին: Այս մոտեցումը ոչ միայն սահմանափակում է երեխաների հնարավորությունները, այլև հակասում է ներառական կրթության սկզբունքներին:

Դպրոցների տնօրենների հետ իրականացված խորացված հարցազրույցների արդյունքներում ևս արտահայտվում են վերոնշյալ խնդիրները: Տնօրենների գերակշիռ մասն ընդգծել է կրթության որակի և մատչելիության առաջնահերթությունը՝ կարևորելով պետական չափորոշիչների լիարժեք կատարումը որպես ռազմավարական ուղղություն:

Նրանց խոսքով՝ ուսուցչի օգնականների հաստիքները ձևավորվել են՝ ելնելով ԿԱՊԿՈւ (կրթության առանձնահատուկ պայմանների կարիք ունեցող) երեխաների թվաքանակից՝ յուրաքանչյուր հինգ երեխայի համար նախատեսելով մեկ օգնական: Տնօրենները քաջատեղյակ են ԿԳՄՍ նախարարության 2017 թ. ապրիլի 13-ի N370-Ն հրամանի դրույթներին, որոնք ծառայում են որպես գործունեության ուղեցույց:

Այնուամենայնիվ, տնօրենների մեծ մասը միակարծիք է, որ առկա մասնագետների քանակը չի

համապատասխանում երեխաների իրական կարիքներին: Առաջարկվում է դպրոցներում ստեղծել ռեսուրսային սենյակներ, որտեղ մասնագիտական աջակցությունը կտրամադրվի անմիջապես դպրոցում: Այս մոտեցումը միաժամանակ կնվազեցնի ծնողների ծանրաբեռնվածությունը և կնպաստի երեխաների սոցիալական ներառմանը: Սակայն, որոշ ծնողներ սխալ են ընկալում այս նախաձեռնությունը՝ դա դիտարկելով որպես երեխաների մեկուսացման կամ առանձնացման փորձ:

Տնօրենները անդրադարձել են նաև ԿԱՊԿՈՒ երեխաների համար պետբյուջեից տրամադրվող նյութատեխնիկական աջակցության միջոցների ձեռք բերման գործընթացին: Ըստ սահմանված կարգի՝ գնումները կատարվում են 27,000 ՀՀ դրամի սահմանաչափով: Սակայն, ինչպես նշել է հարցված տնօրեններից մեկը, հաճախ անհրաժեշտ պարագաները դժվարությամբ են գտնվում վաճառքում, ինչը ոչ միայն երկարացնում է գնումների գործընթացը, այլ նաև հավելյալ աշխատանք է պահանջում: Նրա առաջարկով ավելի նպատակահարմար կլինի, եթե պետությունը կենտրոնացված կարգով կատարի անհրաժեշտ գնումները և տրամադրի դպրոցներին՝ նվազեցնելով վարչարարական բեռը:

Վերլուծությունը ցույց է տալիս, որ դպրոցները բավականաչափ տեղեկացված և գործնականորեն ներգրավված են ներառական կրթության կազմակերպման գործընթացում: Սակայն առկա են նաև համակարգային խոչընդոտներ՝ մասնավորապես կապված շենքային պայմանների, մասնագետների բավարար պաշարի և նյութատեխնիկական գործընթացների բարդության հետ: Ըստ նրանց թիրախային ֆինանսավորումը, ծնողամետ մեխանիզմները, կենտրոնացված գնումները և մանկավարժահոգեբանական մասնագիտական թիմերի ամրապնդումը կարող են էական առաջընթաց ապահովել համընդհանուր ներառականության ապահովման ուղղությամբ:

ՏՄԱԿ և ՀՄԿ համակարգի դերակատարությունը ներառական կրթության շրջանակում


Համընդհանուր ներառական կրթության գործընթացին ուղղված բյուջեի մեծ մասը՝ մոտ 3, 7 մլրդ դրամ՝ կամ 97,8%-ը, հատկացված է մանկավարժահոգեբանական աջակցության ծառայությունների տրամադրմանը և կրթության առանձնահատուկ պայմանների կարիք ունեցող երեխաների կրթության կազմակերպմանն օժանդակող միջոցառումների իրականացմանը: ՀՀ-ում մանկավարժահոգեբանական աջակցություն տրամադրող կազմակերպությունները 21-ն են:

Մանկավարժահոգեբանական աջակցության կենտրոններին գումարները տրամադրվում են պետական ոչ մրցութային դրամաշնորհների տեսքով՝ ԿԳՄՍ նախարարության կողմից, իսկ գումարի 12.2%-ը տրամադրվում է մրցութային կարգով ընտրված կազմակերպություններին:

ԿԳՄՍ նախարարությունից ստացված տվյալների հիման վրա պարզ դարձավ, որ ՏՄԱԿ-ների և ՀՄԿ-ի ֆինանսավորման չափը հաշվարկվել և հատկացվել է 2016 թվականի սեպտեմբերի 22-ի ՀՀ կառավարության “Տարածքային մանկավարժահոգեբանական աջակցության կենտրոնների գործունեության ֆինանսավորման կարգը հաստատելու մասին” թիվ 968-Ն որոշմամբ հաստատված կարգին համապատասխան: ՏՄԱԿ-ների և ՀՄԿ-ի ֆինանսավորման աշխատավարձի ֆոնդը կազմել է 3, 7 մլրդ դրամ:

ԳԾԱՊԱՏԿԵՐ 3

(ԿԱՊԿՈՒ) կրթության կազմակերպմանն օժանդակող միջոցառումների իրականացմանը հատկացվել է՝ 3.7 մլրդ ՀՀ դրամ



Հանդիսանալով ՀՀ ներառական կրթության գործընթացի կազմակերպման, համակարգման և մեթոդաբանության մշակման կարևորագույն սուբյեկտներից մեկը՝ ՀՄԿ-ն, ՍՄԱԿ-ների հետ միասին, պետությունից իրենց հատկացված գումարի սահմաններում իրականացրել են ուսումնական հաստատությունների մասնագետների վերապատրաստումներ, տրամադրել խորհրդատվություններ, իրականացրել մշտադիտարկումներ:

2023-2024 ուսումնական տարուց սկսած ներառական կրթության համակարգում առավել նշանակալի դեր է վերապահված ՍՄԱԿ-ներին և ՀՄԿ-ներին: Դրանք դարձել են ներառականության իրականացման առանցքային դերակատարներ՝ ապահովելով ԿԱՊԿՈՒ երեխաների աջակցությունն ու ուղեկցումը կրթական ճանապարհին:

Այնուամենայնիվ, ինչպես արձանագրել են հարցազրույցներին մասնակցած դպրոցների տնօրենները, ՍՄԱԿ-ների կողմից տրամադրվող մանկավարժահոգեբանական աջակցության ժամանակահատվածը հաճախ բավական չէ՝ պատասխանելու երեխաների իրական և բազմաշերտ կարիքներին: Սա ստեղծում է իրավիճակ, որտեղ ուսուցիչներն ու դպրոցի անձնակազմը մնում են մասնագիտական աջակցությունից զուրկ՝ հատկապես բարդ վարքային կամ զարգացման առանձնահատկություններ ունեցող երեխաների հետ աշխատելիս:

Շատ հաճախ ծնողները լիարժեքորեն տեղեկացված չեն, թե իրենց խնդիրներով ում պետք է դիմեն, կրթական համակարգում որ կառույցն ինչ դեր և պատասխանատվություն է ստանձնում: Արդյունքում, բազմաթիվ հարցեր մնում են չպարզաբանված ու «օդում կախված»:

Այս տեղեկատվական բացը հաճախ հանգեցնում է նրան, որ հաշմանդամություն ունեցող երեխան դպրոց է հաճախում միայն այն օրերին, երբ նախատեսված է ՍՄԱԿ-ի մասնագետի այցելությունը: Այս իրավիճակը ոչ միայն խաթարում է երեխայի կրթական շարունակականությունը, այլ նաև վկայում է համակարգային հաղորդակցության և ծառայությունների համադրման բացի մասին:

Շաբաթը մեկ օր 20 րոպեով են աշխատում: Քիչ է հատկացված ժամանակը: Ծնողը մեկ րոպեի հետ էլ հույս է կապում: Իրանք/մասնագետները/ անընդհատ գնում են վերապատրաստման և գնում են երեխաների հաշվին: Շաբաթական 1 օր է եղել, որ պետք է աշխատեն, եղել են վերապատրաստման: Ես կողմ եմ իրենց վերապատրաստումներին, բայց ոչ իմ երեխայի հաշվին...

«Ֆոկուս խմբային քննարկման մասնակից ծնող»

Ինչպես երևում է համընդհանուր ներառական կրթության գործընթացին ուղղված պետական քաղաքականությունից ՄՄԱԿ-ների աշխատանքը կարևոր հենասյուն է ներառական կրթության արդյունավետ կազմակերպման գործում: Նրանք դարձել են միակ մասնագիտական օղակը, որից դպրոցներն ու ծնողները պետք է ստանան նպատակային աջակցություն: Սակայն ներկայում դրանց գործունեությունը բախվում է ժամանակային սահմանափակումների, մասնագետների պակասի և տարածքային անհասանելիության խնդիրների: Նկատելի է, որ համակարգում առկա է ֆինանսական ռեսուրսների ոչ համաչափ բաշխում, որն ի հայտ է գալիս հատկապես՝ ՄՄԱԿ-ների և հանրակրթական դպրոցների համեմատության մեջ: Դպրոցներն, որոնք հանդիսանում են երեխաների ուսուցման և ներառման իրական տարածք, ունեն գերծանրաբեռնված ուսուցիչներ, մեծ թվով ԱՌԻՊ ունեցող երեխաներ, չհարմարեցված միջավայր, հատուկ մասնագետների և ուսումնական նյութերի պակաս: Միևնույն ժամանակ, նրանց ֆինանսական հնարավորությունները խիստ սահմանափակ են, ինչը խոչընդոտում է ներառական կրթության արդյունավետ իրականացումը: ՄՄԱԿ-ները, որոնք ի սկզբանե նախատեսված են որպես աջակցող կառույցներ՝ (գործողություն՝ երեխայի կարիքների ախտորոշում, ԱՌԻՊ մշակում, մեթոդական աջակցություն), հաճախ ունեն ավելի լայն բյուջե, մեծ վարչական ծախսեր (վարձ, սպասարկում, տեխնիկա), աշխատակիցների համեմատաբար քիչ ծանրաբեռնվածություն, և փակ գործառույթներ, որոնք սահմանափակվում են գնահատմամբ, ոչ՝ երկարաժամկետ ուղեկցմամբ: Այս իրավիճակը հանգեցնում է նրան, որ՝ ռեսուրսները գնում են աջակցող շերտին, այլ ոչ առաջնային՝ կրթական գործընթացին, դպրոցները մնում են առանց բավարար միջոցների՝ ապահովելու իրական ներառական կրթություն, համակարգում չի նկատվում հաշվետվողականություն կամ արդյունավետության չափում՝ ռեսուրսների համատեքստում:

Դպրոցն ունի հարմարավետության, թեքահարթակների խնդիր: Պարտադիր երկու ամիսը մեկ պետք է լինի ժողով, որտեղ պետք ա լինեն ՄՄԱԿ-ի բոլոր մասնագետները , օգնականներ, փոխտնօրենները, հիմնականում չեն արել: Շատ է լինում, որ դպրոցի մանկավարժները շատ տգեղ անգգույշ խոսքեր են ասում: Ես ասել եմ, որ պետք է լինի ԿԱՊԿՈՒ երեխաների իրավունքների պաշտպան, իրավաբան, որ հետևի այս ամենին, հետևի, որ մասնագետներն իրենց աշխատանքը ճիշտ անեն, հետևեն բառամթերքին:

«Ֆոկուս խմբային քննարկման մասնակից ծնող»

Կրթության առանձնահատուկ պայմանների կարիք ունեցող (ԿԱՊԿՈՒ) երեխաներն ունեն մի շարք իրավական երաշխիքներ՝ ամրագրված ինչպես ազգային օրենսդրությամբ, այնպես էլ միջազգային պայմանագրերով (այդ թվում՝ ՄԱԿ-ի Հաշմանդամություն ունեցող անձանց իրավունքների մասին կոնվենցիայով): Սակայն, գործնականում հաճախ արձանագրվում են իրավախախտումներ կամ բացթողումներ, որոնք կապված են ինչպես դպրոցի ներսում խտրականության, այնպես էլ մատչելիության սահմանափակումների, խոչընդոտող միջավայրի կամ արդյունավետ իրավական մեխանիզմների բացակայության հետ:

Այս համատեքստում ծնողները գտնում են, որ անհրաժեշտ է դպրոցներում կամ կրթության տարածքային կառույցներում ունենալ իրավաբանի առանձին հաստիք, որի գործառույթները կլինեն՝ ԿԱՊԿՈՒ երեխաների իրավունքների պաշտպանություն և իրավական խորհրդատվություն ծնողներին, ուսուցիչներին և դպրոցների ղեկավարությանը: Կիրականացնեն իրավական միջամտություն խտրականության դեպքերում կամ իրավունքների խախտման այլ իրավիճակներում: Ի վերջո կկազմակերպեն ներկայիս օրենսդրական դաշտի մշտադիտարկում և մանկավարժահոգեբանական աջակցություն ցուցաբերող թիմերի

իրավական աջակցություն՝ փաստաթղթային ձևակերպումներում և ընթացակարգերում: Ծնողները գտնում են, որ իրավաբանի ներգրավումը կբարձրացնի ոչ միայն հաշվետվողականության մակարդակը, այլև կհանգեցնի ԿԱՊԿՈւ երեխաների իրավունքների համակարգված պաշտպանությանը՝ ապահովելով ներառական կրթության իրական հավասար հնարավորություններ:

ԵԶՐԱԿԱՅՈՒԹՅՈՒՆ

Հայաստանի ներառական կրթության քաղաքականությունը կարևոր քայլ է դեպի սոցիալական ներառում և հավասար հնարավորությունների ապահովում բոլոր երեխաների համար: Չնայած վերջին երկու տասնամյակում արձանագրված է զգալի առաջընթաց, համակարգի շարունակական զարգացումը պահանջում է բավարար ֆինանսավորում, թափանցիկ կառավարում, ինչպես նաև ուսուցիչների պատրաստվածության և ենթակառուցվածքների մշտական կատարելագործում:

Այսօր Հայաստանի Հանրապետությունում առկա է ներառական կրթության իրավական կայուն հիմք, որը նպաստում է կրթական հավասար հնարավորությունների ստեղծմանը և հասարակության մեջ համերաշխության ու հարգանքի արժեքների ձևավորմանը: Սակայն քաղաքականությունը պետք է վերածվի գործնականում արդյունավետ և կիրառելի լուծումների՝ հիմնված երեխայի անհատական կարիքների վրա:

Ֆինանսավորման կառուցվածքը, մասնավորապես՝ մանկավարժափոխանակական աջակցությանը տրամադրվող գերակշիռ ռեսուրսները, վկայում է պետության գիտակցված հանձնառության մասին: Միևնույն ժամանակ, արդյունավետության բարձրացման համար անհրաժեշտ է զարգացնել վերահսկման, գնահատման և մեթոդական աջակցության հստակ մեխանիզմներ՝ ապահովելով համակարգի գործնական արդյունքայնություն:

Ներառական կրթության իրականացումը մեծապես կախված է այն աջակցությունից, որ երեխան ստանում է դասարանում: Ուսուցիչները հաճախ կանգնում են ծանրաբեռնվածության և ռեսուրսների սահմանափակության առաջ, ինչը դժվարացնում է կրթության անհատականացված մոտեցման ապահովումը: Շատ երեխաներ ունեն ֆիզիկական, զգայական, վարքային կամ ուսման դժվարություններ և անհատական աջակցության կարիք՝ առաջադրանքները հասկանալու, շարժվելու, հաղորդակցվելու կամ կենտրոնանալու համար:

Այս համատեքստում կենսական անհրաժեշտություն է անձնական օգնականների ինստիտուտի զարգացումը դպրոցներում: Դա ոչ միայն կրթական իրավունքի երաշխավորում է, այլ նաև խթան՝ ներառական միջավայրի կայացման, ուսուցիչների մասնագիտական բեռնաթափման և երեխայի ինքնուրույնության ու սոցիալականացման համար: Հակառակ դեպքում, այդ դերը հաճախ անցնում է ծնողներին, ինչը խոչընդոտում է թե՛ նրանց աշխատանքային հնարավորություններին, և թե՛ երեխայի զարգացող ինքնուրույնությանը:

Ծնողների արձագանքները ցույց են տալիս, որ համակարգը դեռևս լիարժեք ճկուն չէ և ոչ միշտ է համընկնում երեխայի իրական կարիքների հետ: Հետևաբար, անհրաժեշտ է առաջ տանել ավելի կիրառական և մարդակենտրոն լուծումներ՝ լիարժեք լսելով և ներառելով ծնողի և երեխայի ձայնը քաղաքականությունների մշակման և ծառայությունների տրամադրման գործընթացներում:

ԱՌԱՋԱՐԿՈՒԹՅՈՒՆՆԵՐ

Հայաստանում ներառական կրթության համակարգի ամրապնդման համար առաջարկվում են հետևյալ քայլերը՝

1. Բարձրացնել ֆինանսավորման թափանցիկությունը. ԿԳՄՄՆ-ն պետք է հրապարակի ներառական կրթության համար հատկացված բյուջեի վերաբերյալ մանրամասն տարեկան զեկույցներ՝ նշելով ծախսերի բաշխումը (ենթակառուցվածքներ, վերապատրաստում, ռեսուրսներ):
2. Իրականացնել ՏՄԱԿ-ների բյուջեի վերանայում և վերաբաշխում՝ ըստ հետևյալ սկզբունքի՝ ՏՄԱԿ-ների վարչական ծախսերը կրճատել, ապահովելով հիմնական ֆունկցիայի իրականացումը: Ազատված միջոցներն ուղղել՝
 - ✓ Դպրոցներում անձնական օգնականների հաստիքի ներդրմանը,
 - ✓ ուսուցիչների հավելավճարներին ներառական կրթության ապահովման համար:
3. Ստեղծել մոնիթորինգային հստակ մեխանիզմներ՝ ներառական կրթության որակի, հասանելիության ու արդյունավետության գնահատման համար:
 - 3.1 Ներդնել գնահատման գործընթաց: Մասնավորապես, ծնողներին հնարավորություն ընձեռել յուրաքանչյուր ուսումնական տարեվերջին իրականացնել երեխայի հետ աշխատող մասնագետի գնահատում: Թերթիկը պետք է լինի անանուն: Տվյալ գործառույթը կարող է իրականացնել հնարակրթական դպրոցի և/կամ մանկապարտեզի վարչական աշխատակազմը:
 - 3.2 Հիմնել բողոքարկման և արձագանքման թափանցիկ հարթակներ՝ երեխաների, ծնողների, խնամակալների և ուսուցիչների համար:
4. Ներդնել ոլորտային իրավունքի պաշտպանի հաստիք:
5. Կրթական հաստատություններում ներդնել անձնական օգնականի հաստիք: Անձնական օգնականը կաջակցի երեխային՝ դասերի ընթացքում՝ հասկանալու, աշխատելու, գրելու, ընթերցելու հարցերում: Դասից դուրս՝ տարածքում տեղաշարժվելու, կազմակերպվելու, հոգատար միջավայր ունենալու, հաճախ նաև՝ շփման, հուզական հարմարավետության հարցերում: Այն չի փոխարինում ուսուցչին, այլ օգնում է ապահովել երեխայի անհատական ուսումնական պլանի (ԱՈԻՊ) իրագործումը:
6. ԿԱՊԿՈՒ/ԿԶԱՊԿ երեխաների հետ աշխատանքներում ընդգրկել ֆիզիոթերապիստ, ով կաշխատի ֆիզկուլտուրայի դասաժամերի ընթացքում:
7. Դպրոցներում և մանկապարտեզներում վերականգնել բազմամասնագիտական թիմի հաստիքները՝ ներառյալ լոգոպեդ, սոցիալական մանկավարժ:
8. Դպրոցներում և մանկապարտեզներում ստեղծել ռեսուրս-սենյակներ, որոնք հազեցած կլինեն անհրաժեշտ նյութատեխնիկական բազայով և կունենան համապատասխան կահավորանք: Բացի մասնագիտական թիմից ռեսուրս-սենյակներում կցված լինեն սոցիալական օգնականներ, ովքեր անհրաժեշտության դեպքում կցուցաբերեն անհատական մոտեցում՝ կարիքների հիման վրա:

9. Ծնողական համայնքի շրջանում իրականացնել իրազեկում՝ իրավական, կրթական և առողջապահական ոլորտների վերաբերյալ:
10. Ռեսուրս-սենյակներում տեղադրել տեսախցիկներ կամ ունենա այնպիսի ապակիով պատուհան, որ երեխան ներսից ծնողին չտեսնի, իսկ ծնողը՝ տեսնի:
11. Անցում կատարել վաուչերային համակարգի, երբ ծնողը ինքը կարող է ընտրել մասնագետ իր երեխայի հետ աշխատելու համար՝ հիմք ընդունելով մասնագետի աշխատանքի արդյունավետությունը և հեղինակությունը:
12. Համայնքային բյուջեները անցում կատարեն ծրագրային բյուջետավորման՝ ինչպես պետական բյուջեն:

Հավելվածներ

Հաշմանդամություն ունեցող երեխաների ծնողների հետ ֆոկլուս խմբի հարցաշար

Ներկայացնել հետազոտության նպատակը և թե ինչպես են օգտագործվելու հարցազրույցի պատասխանները:

Հարցաթերթը նպատակ ունի հավաքել ծնողների կարծիքները և առաջարկությունները՝ ներառական կրթության վերաբերյալ:

Սույն հետազոտությունը անանուն է, վերլուծությունը ներկայացվելու է ընդհանրական:

Եթե դեմ չեք՝ ձայնագրեմ, ձայնագրությունը միայն սղագրելու նպատակով է արվում և հասանելի է լինելու բացառապես հետազոտող թիմին, իսկ վերլուծությունից հետո՝ կոչնչացվի:

Ձեր թույլտվությամբ միացնում եմ ձայնագրությունը:

ՀԱՐՑԱՇԱՐ

1. Ընդհանուր տվյալները.

1.1. Ֆոկլուս խմբի քննարկմանը մասնակցող ծնողների երեխաների տարիքային խումբ/հարց հազրուցավարին/:

- 6-9
- 10-15

2. Երեխայի կարիքները և կրթական ծառայությունները.

2.1. Ինչպիսի՞ պայմանների և ի՞նչ ծառայությունների կարիք ունի Ձեր երեխան դպրոցում:

- Անձնական օգնական (թարգմանիչ, օգնական ուսուցիչ)
- Աջակցող մասնագիտական թիմ/հոգեբան, լոգոպեդ և այլն/
- Պետական հատուկ ծրագրեր
- Տեխնոլոգիական աջակցության միջոցներ
- Անհատականացված դասեր /ԱՌԻՊ, տնային ուսուցում, հավելյալ/մասնավոր/ արտադպրոցական պարապմունքներ, թերապիաներ/
- Բարելավված միջավայր (սենյակներ, համալիր միջավայր)
- Այլ (նշեք) _____

2.3. Ի՞նչ խնդիրների եք հանդիպում/բախվում, երբ փորձում եք օգտվել այս ծառայություններից՝ կապված պետական միջոցների և ծրագրերի հետ:-----

2.4. Քանի՞ տարի է, ինչ Ձեր երեխան ընդգրկված է ներառական կրթություն համակարգում:

3. Մասնագիտական աջակցություն

3.1. Ինչ եք կարծում, արդյոք ՀՀ դպրոցներում ԿԱՊԿՈԻ երեխաներին համակարգված մասնագիտական աջակցություն ցուցաբերող մասնագետների (հոգեբաններ, լոգոպեդներ, սոցիալական մանկավարժներ և այլ) թիմի աշխատանքը բավարար են՝ Ձեր երեխայի կարիքները հոգալու համար:

- Այո/մանրամասնել/
- Ոչ/մանրամասնել/

3.2. Արդյո՞ք ունեցել եք մասնագետների հետ համագործակցության դժվարություններ՝ ֆինանսական սահմանափակումներով կամ ծրագրերի պակասով պայմանավորված: -----

3.3. Արդյո՞ք պետական բյուջեից տրամադրվող միջոցները բավարար են՝ երեխաների հատուկ կարիքներին համարժեք աջակցություն ցուցաբերելու համար:

- Այո
- Ոչ
- Չգիտեմ

4. Ֆինանսավորումը և ուսումնական ծառայությունների հնարավորությունները.

4.1. Ձեզ հայտնի՞ է, թե դպրոցները ինչպես են ֆինանսավորում երեխաների համար՝ հատուկ կրթական ծրագրերն իրականացնելիս:

- Այո (եթե այո՝ մանրամասնել-----)
- Ոչ

4.2. Որքանո՞վ լավ է իրականացվում այդ ֆինանսավորումը ըստ Ձեզ:

- Շատ լավ
- Լավ
- Բավարար
- Անբավար

4.4. Դուք կարծում եք, որ ՀՀ-ում ներառական կրթության ֆինանսավորումը պետք է ավելանա՞:

- Այո
- Ոչ
- Չգիտեմ

4.5. Ըստ Ձեզ, ո՞րն է/որո՞նք են ՀՀ-ում ներառական կրթության ֆինանսավորման անբավարար կամ թերի լինելու պատճառը/պատճառները:

- Մակավ ֆինանսավորումը/պետական բյուջեի անբավարար միջոցները
- Աջակցման միջոցների/անհատականացված ուսումնական ծրագրեր՝ ԱՌԻՊ, դիդակտիկ նյութեր, մասնագիտական աջակցություն, վերապատրաստված ուսուցիչներ և անձնակազմ, հարմարեցված ֆիզիկական միջավայր, հատուկ տեխնոլոգիաներ՝ համակարգիչներ և պլանշետներ, ատլիոգրքեր, շոշափողական, բրայլյան և տեսողական պարագաներ և այլն/ ոչ ամբողջական հասանելիությունը
- Աջակցման ծրագրերի անհամապատասխանությունը երեխաների կարիքներին:
- Այլ (նշեք) _____

4.6. Համաձայն եք, որ պետական ֆինանսավորումը պետք է ուղղվի նաև դպրոցների ենթակառուցվածքների բարելավմանը:

- Այո
- Ոչ

4.7 Տեղյակ եք ինչ ասել է “աջակցող միջոցներ” կամ “համընդհանուր դիզայն”:

4.7.1 Դպրոցները որքանո՞վ պետք է հետևեն “համընդհանուր դիզայն”-ի սկզբունքներին:

4.7.2 Իսկ որպես ծնող, որքանո՞վ եք Դուք մասնակցություն ունենում դպրոցի մատչելիության ապահովման գործընթացներում:

4.8. Ի՞նչ եք կարծում, եթե ՀՀ կառավարության կողմից բյուջետային միջոցները ավելանան, ապա դա կբարելավի ներառական կրթության որակը և հասանելիությունը Հայաստանում:

- Այո
- Ոչ
- Մասամբ

4.9. Արդյո՞ք երբևէ մասնակցել եք/ներկա եք եղել դպրոցի բյուջեի քննարկմանը: Եթե այո, ապա մանրամասնեք:

4.10. Եթե երբևէ չեք մասնակցել կամ մասնակցել եք, սակայն նորից նման հնարավորություն լինել, կցանկանայիք մասնակցել:

5. Առաջարկներ.

5.1. Որո՞նք են այն ծառայությունները կամ ծրագրերը, որոնք հասանելի չեն Ձեր երեխային դպրոցում, սակայն կցանկանայիք, որպեսզի նա օգտվեր դրանցից: -----

6. Ընդհանուր կարծիքներ.

6.1. Որպես ծնող, ինչպե՞ս եք գնահատում ՀՀ-ում ներառական կրթության ընդհանուր վիճակը:

- Շատ լավ
- Լավ
- Բավարար

• Անբավարար

6.2. Իսկ ինչպե՞ս եք գնահատում ներառական կրթության ոլորտում կառավարության ջանքերը՝ հաշվի առնելով Ձեր երեխայի կարիքները:-----

6.3. Ի՞նչ այլ քայլեր պետք է ձեռնարկվեն, որոնք կարող են նպաստել՝ բարձրացնելու առանձնահատուկ պայմանների կարիք ունեցող երեխաների մասնակցությունը կրթական գործընթացին: -----

6.4. Ինչպիսի՞ ներդրումներ կամ բարելավումներ եք ուզում տեսնել պետությունից տրամադրված ֆինանսավորման մեջ՝ հատուկ կարիքներով երեխաների կրթվելու գործընթացն ավելի արդյունավետ կազմակերպելու համար:-----

Շնորհակալություն

Մույն ուսումնասիրությունը մշակվել է Եվրոպական միության ֆինանսական աջակցությամբ, «Իրավաբանների հայկական ասոցիացիա» հասարակական կազմակերպության ղեկավարությամբ կոնսորցիումով գործարկվող «Բյուջեներ քաղաքացիների համար» ծրագրով տրամադրված ենթադրամաշնորհի շրջանակներում «Լուսաստղ» հասարակական կազմակերպության կողմից իրականացվող «Համընդհանուր ներառում. Պետական ներդրումների արդյունավետություն և հաշվետվողականություն» ծրագրի շրջանակներում: Բովանդակության համար պատասխանատվություն է կրում «Լուսաստղ» հասարակական կազմակերպությունը, և պարտադիր չէ, որ այն արտահայտի Եվրոպական միության տեսակետները:

ԴՊՐՈՑՆԵՐԻ ԵՎ ՏՄԱԿ ՏՆՕՐԵՆՆԵՐԻ ՀԵՏ ՀԱՐՑԱԶՐՈՒՅՑԻ ՀԱՐՑԱՇԱՐ

Ներկայացնել հետազոտության նպատակը և թե ինչպես են օգտագործվելու հարցազրույցի պատասխանները:

Ձեր անունը հետազոտության մեջ կնշվի միայն ձեր թույլտվությամբ և համաձայնությամբ, և եթե դեմ եք, որ անունը նշվի, կօգտագործվի «դպրոցի տնօրեն» արտահայտությունը:

Եթե դեմ չեք՝ ձայնագրեմ, ձայնագրությունը միայն սղագրելու նպատակով է արվում և հասանելի է լինելու բացառապես հետազոտող թիմին, իսկ վերլուծությունից հետո՝ կոչնչացվի:

Ձեր թույլտվությամբ միացնում եմ ձայնագրությունը:

Նշեք, խնդրեմ, դպրոցի տեսակը՝

- հիմնական
- միջնակարգ

1. Որո՞նք են Ձեր դպրոցի առաջնահերթությունները:
2. Ի՞նչ սկզբունքով է գրվում դպրոցի ռազմավարական պլանը:
3. Ինչպե՞ս է դպրոցը իրականացնում տարբեր կարողություններով աշակերտների ուսուցումը:
 - 3.1 Թվով քանի՞ ներառված երեխա կա դպրոցում այս պահի դրությամբ:
 - 3.2 Նրանցից քանի՞սն են տարրական օղակում, քանի՞սը՝ միջին:

3.3 Ի՞նչ տեսակի հատուկ կարիքներ ունեն այդ երեխաները՝ ֆիզիկական, մտավոր հուզական, ուսումնական...

3.4 Ի՞նչ լրացուցիչ աջակցություն է տրամադրվում դպրոցում այդ երեխաներին՝ հոգեբան, լոգոպեդ, հատուկ մանկավարժ...

4. Կա՞ն արդյոք այլ պետական կառույցներ, որոնք դպրոցում նման ծառայություններ են մատուցում ԿԱՊԿՈւ երեխաներին:
5. Ինչպիսի՞ միջոցներ են հասկացվում Ձեր դպրոցին ՀՀ պետությունից ներառական կրթության նպատակով:
 - 5.1 Որքա՞ն է գումարի տարեկան չափը:
 - 5.2 Արդյո՞ք կա հստակ որոշված բաշխման մեխանիզմ:
6. Ինչպե՞ս են բաշխվում ամբողջ ուսումնական տարվա համար նախատեսված ֆինանսական միջոցները (արդյո՞ք Դուք եք պետությանը թելադրում ձեր կրիքները, թե պետությունն է թելադրում ծախսերը):
 - 6.1 Որքանո՞վ է նպատակահարմար, երբ Դուք/դպրոցը/ եք պետությանը թելադրում ձեր կարիքները(թերություններ և առավելություններ):
 - 6.2 Որքանո՞վ է նպատակահարմար, երբ պետությունն է թելադրում ձեր/դպրոցի/ ծախսերը(թերություններ և առավելություններ)
7. Արդյո՞ք հատկացվող գումարը բավարար է ներառված բոլոր երեխաների կարիքները հոգալու համար:
8. Ի՞նչ հիմնական ծրագրերի կամ կարիքների համար են ծախսվում հատկացված միջոցները. նշեք, խնդրեմ, թե որոշակի գումարի չափն ի՞նչ ծառայության համար է նախատեսված՝
 - Մասնագետներ/դասավանդող, լոգոպեդ, հոգեբան, հատուկ մանկավարժ.../
 - Տեխնիկական միջոցների ձեռքբերում/համակարգիչներ և պլանշետներ, աուդիոգրքեր, լսողական սարքեր, շոշափողական, բրայլյան և տեսողական պարագաներ և այլն .../
 - Ֆիզիկական միջավայրի հարմարեցվածություն/թեքահարթակ, հարմարեցված սանհանգույց, վերելակ.../
 - Այլ

8.1. Արդյո՞ք Դուք, որպես դպրոցի տնօրեն, կիրառում եք “ինտերակտիվ բյուջե” գործիքը՝ դպրոցի ֆինանսական կառավարումը հեշտացնելու համար:

9. Արդյո՞ք դպրոցում առկա է բավարար թվով կադրային անձնակազմ՝ հատուկ կարիքներով երեխաներին անհրաժեշտ ծառայությունների տրամադրման համար:
10. Արդյո՞ք բավարար են կրթական ոլորտում հատուկ կարիքներով երեխաների հետ աշխատող առկա մասնագետների պատրաստվածության աստիճանը, մասնագիտական որակները:
11. Կազմակերպվո՞ւմ են վերապատրաստումներ դպրոցի մանկավարժների համար, և արդյո՞ք դրանց մի մասը ուղղված է ներառական կրթությանը:
12. Ընհանուր առմամբ, տեղյակ եք, թե որքան գումար է պետությունից նախատեսված 2024-2025թթ. ուս.տարվա ներառական կրթության համար:
13. Որքանով որ Դուք եք տեղյակ, կա՞ առանձնացված բյուջետային տող ներառական կրթության համար:
14. Ինչպե՞ս է բաշխվում ֆինանսավորումը կրթական հաստատությունների միջև. արդյո՞ք արդար է գումարի բախումը և ի՞նչ չափորոշիչներով է իրականացվում:
15. Արդյո՞ք իրականացվում է մշտադիտարկում՝ պետությունից ներառական կրթությանն ուղղված միջոցների հետ կապված:
16. Եթե այո, ապա ի՞նչ մեխանիզմներով է դա իրականացվում և ո՞վ/ովքե՞ր է/են այն իրականացնողները:

17. Արդյո՞ք դպրոցի ուսուցիչները և ծնողները ներգրավված են դպրոցի բյուջեի պլանավորման և կառավարման գործընթացում:
- 17.1 Եթե այո, ինչպե՞ս է կազմակերպվում նրանց մասնակցությունը:
- 17.2 Արդյո՞ք ծնողխորհրդում ընդգրկված է հաշմանդամություն ունեցող երեխայի ծնող:
18. Ինչպե՞ս է ապահովվում բյուջեի թափանցիկությունը դպրոցում:
- 18.1 Արդյո՞ք ֆինանսական հաշվետվությունները հասանելի են շահագրգիռ կողմերին (ԿԳՄՄ, ծնողխորհուրդ, ուսուցիչներ):
- 18.2 Ինչպե՞ս են ներկայացվում այդ հաշվետվությունները (օրինակ՝ ժողովներում, փաստաթղթերով և այլն):
19. Առհասարակ, ինչպե՞ս կարող են հատուկ կարիքներով երեխաների ծնողները տեղեկանալ իրենց երեխաներին տրամադրվող ծառայությունների և ֆինանսավորման մասին:
20. Ի՞նչ մարտահրավերներ կամ խնդիրներ եք տեսնում ներառական կրթության ֆինանսավորման առումով:
21. Ի՞նչ մարտահրավերներ կամ խնդիրներ եք տեսնում այդ ֆինանսների օգտագործման առումով:
22. Ի՞նչ առաջարկներ կամ լուծումներ ունեք ներառական կրթությանն ուղղված բյուջետային միջոցների արդյունավետության վերաբերյալ:
23. Ի՞նչ առաջարկներ կամ լուծումներ ունեք ներառական կրթությանն ուղղված բյուջետային միջոցների թափանցիկության վերաբերյալ:
- 23.1 Կա՞ ինչ որ խնդիր, որի մասին Դուք կցանկանայիք բարձրաձայնել, բայց հարցազրույցի ընթացքում անդրադարձ չկատարավեց:

Սույն ուսումնասիրությունը մշակվել է Եվրոպական միության ֆինանսական աջակցությամբ, «Իրավաբանների հայկական ասոցիացիա» հասարակական կազմակերպության ղեկավարությամբ կոնսորցիումով գործարկվող «Բյուջեներ քաղաքացիների համար» ծրագրով տրամադրված ենթադրամաշնորհի շրջանակներում «Լուսաստո» հասարակական կազմակերպության կողմից իրականացվող «Համընդհանուր ներառում. Պետական ներդրումների արդյունավետություն և հաշվետվողականություն» ծրագրի շրջանակներում: Բովանդակության համար պատասխանատվություն է կրում «Լուսաստո» հասարակական կազմակերպությունը, և պարտադիր չէ, որ այն արտահայտի Եվրոպական միության տեսակետները: